

四庫全書

集部

欽定四庫全書

集部

蘭軒集卷二

詳校官中書_臣羅錦森

侍讀_臣孫球覆勘

謄錄舉人_臣黃道甌

謄錄監生_臣單可茲

欽定四庫全書

集部五

提要

蘭軒集十六卷

別集類四

元

臣等謹案蘭軒集十六卷元王旭撰旭字景初東平人其事蹟不見於元史談藝亦罕見稱述顧嗣立撰元詩選彙輯至三百家不載旭集則遺篇久佚可知惟山東通志稱旭與同郡王搆及永年王磐俱以文章名世天下

號為三王而於其出處本末亦未詳載則併
其人亦幾湮沒矣今以集中詩文考之蓋旭
家貧力學教授四方嘗為碭山令所賓禮送
王侯二生序所云至元庚寅碭宰崔公以禮
招余至其邑俾專講席者是也又嘗至長蘆
主高百川家中和書院記所云辱承君幣來
自泰山者是也其餘如安陽如鄆城如鯨川
皆所曾僑寓之地又嘗至杭州之長沙遊跡

幾半天下而卒未登仕版其有寄詩云處困
不堪家累重謀生聊藉主人賢生平境遇即
此可以見其大縣矣其詩隨意抒寫不屑屑
于雕章琢句而氣體超邁亦復時見性靈古
文多講學家言其井田說一篇務欲復三代
制迂濶尤甚殆全不解事之腐儒然如記序
諸作和平通達與之坐而談理其持論則未
嘗不醇正未可廢也其集見于文淵閣書目

中者一部一冊而焦竑經籍志則作二十卷
今從永樂大典採掇排比尚可得十六卷決
非一冊所能盡或一冊一字為十字之訛歟
乾隆四十六年九月恭校上

總纂官

臣紀昀 臣陸錫熊

臣孫士毅

總校官

臣

陸費墀

欽定四庫全書

蘭軒集卷一

元王旭撰

賦

古劍賦

客有厲迹名場經營四方激風雲於詭辯變天地於低昂氣滿志得悲憐寒鄉者一旦謂主人曰吾有寶劍其名干將非砥非礪自鋒自鋸眩眩兮紫電稜稜兮秋霜挺三尺之精英抱百鍊之純鋼運之以機權錯之以文

章形之以利便脅之以禍殃鼓舞闔闢操縱抑揚惟利是從不拘其常或左或右萬夫莫當朝離乎泥塗夕宿乎巖廊入金門上玉堂虎豹兮紛拏蛟龍兮陸梁同驅兮並驚我全兮彼傷處女摧鋒而却立猿公失據而惑惶此劍一試身名兩彰若此者得非主人之所願觀乎主人曰噫客知今之劍而未知古之劍也夫古之劍鑄之以元氣鍊之以陰陽鍛之以五行淬之以三光匣之以仁義佩之以忠良卷之不盈握舒之彌八荒赫赫明

明收功於文武巍巍蕩蕩無敵於陶唐五伯假之而為
伯三王本之而為王正地維振天綱幹萬化懸中央氣
塞乎宇宙形藏乎混茫淺滄海兮卑太行小崆峒兮近
扶桑來無所從去無所往固浩然獨立於天地不與物
而存亡此劒一試太平無疆若此者又非薛燭之所能
辯張華之所能識而吾子之所能髣髴而論量也客於
是喪其所有茫然而退

擬遠遊賦

并序

昔予南遊遇劉陵川於毫社之泮宮因誦舊著詩文
數篇以求指教劉喜謂座客曰是子頗有氣象將來
可望惜吾之老而力弱不能振也命酒因語及楚詞
篇目且歎屈原之文詞而哀其忠因為僕曰子為我
擬賦遠遊一篇來僕辭不敢劉曰吾姑試子宜無辭
遂明日呈此蓋以述原之情有志而不遂亦九辯代
原之意而亦以自寄云時至元三年冬十一月也

原註

先生諱芳字元卿
時年七十矣

邈鴻荒忽已遠兮望前修而莫及仰六聖之玄風兮懷
三皇之淳德後精魂於千載兮曰予希其彷彿忽翩然
而下墜兮心滔滔而何極悲斯世之沈濁兮背馳余而
莫偶既醉酒以昏酣兮又中風兮狂走諒紛華不可長
兮獨冲澹以自守惟天地之漫漫兮浩變化之無窮哀
吾生之促迫兮寄瞬息乎其中思遠遊以舒憤兮超逍
遙以長終營營而無寐兮晝鬱鬱其不樂仰浮雲之縹
緲兮願輕車而無託精神忽其流蕩兮離人羣而高逸

雲為車而風為馬兮召飛廉以執轡八龍婉婉以前導
兮云濟予乎西北過玄武而至太微兮問瓊宮之所在
排閭闔以徑度兮慶天皇之佳會叩玉階以對揚兮陳
下土之迫隘激微忠而抗音兮願乾坤之交泰令雲雨
以飛揚兮降膏澤之滂沛飽四海以玄精兮飲羣生以
沆瀣吐微誠之未終兮驚羣公之譎恠令豐隆之奏技
兮振天鼓之砰礚中鬱陶而莫遂兮還余車而言邁視
人寰不足留兮余將觀乎方之外乘青陽以東遊兮遇

廣成於崆峒問道德之微言兮願開予之所蒙曰道不
難授兮將其人之難得粗者不可傳兮尚安語其所極
其大無方兮其小無內無屈其志兮無滯其氣順開闔
於陰陽兮法化育於天地澹逍遙以無為兮使精神之
得一可長生而超化兮斯道真之所貴受微言而拜謝
兮聞神丘而遂沮涉清海之漫漫兮訪潛龍之幽居入
珠宮與貝闕兮世莫知予之所為召海若兮邀處妃歌
天吳兮舞馮夷吸翠霞之夭矯服明月之流離雖極樂

而非余志兮告潛龍以俱行志參差以叛渙兮悵遐舉
而獨征過弱水而超扶桑兮至神丘而一息從王喬與
琴高兮娛青春以遊戲嘆榮華之不足恃兮恐六龍之
蹉跎留余車於崑山兮飲余馬於雲河登閭風以回顧
兮哀神州而曠蕩下茫茫而不見人兮蔽林壑之蒼莽
悲故鄉之若斯兮吾歸來而何望情依依以遲遲兮心
悠悠以漾漾思重華而南征兮正予冠而翱翔驂紫臺
之青鸞兮馭丹穴之鳳凰清風過洞庭倒影凌瀟湘夕

沐浴於湯谷兮振蘭衣兮與菊裳晨謁帝於蒼梧兮問
理國之大方曰禮樂以為資兮道德以為章舉賢而授
能兮安天下於巖廊夫惟聖哲以長茂兮何後王之多
僻違先民之度程兮張冥行而自遂拔蘭荃而不樹兮
猷畎紛其荒穢欲永訣而不忍兮聊逍遙以遊世訪神
人於姑射兮探禹穴於會稽從四子於汾陽兮觀大道
之所歸徑流沙而西渡兮夕予宿乎三危履大禹之所
經兮窺神功之偉竒涉虞淵而越赤水兮路不周以左

轉召萼收使前驅兮承西皇之寵餞謁顙頊於玄都兮
心娛樂而忘返悲虹蜺之擁隔兮悵靈光之浸遠越崑
崙而超玄圃兮臨舊鄉而顧懷御房精而衛太歲兮載
霓旌與雲旂乘飛龍之縹緲兮澹超然以無為飽羣聖
之道德兮醉天地之華滋精淳粹以晁茂兮神淪幽而
入微侶太初而友混玄兮還及君之未衰亂曰翩冥冥
兮愁相紆覽青春兮不可娛縱我步兮高馳驅御列缺
兮鞭雷車西崑崙兮東海隅入海簸弄兮明月珠歸人

寰兮悲亦陋餐六氣兮延我壽周六幕兮超八荒志不
遂兮空翱翔思攀瓊宮兮謁六帝遣巫咸兮歸下世平
陰陽兮正春秋宣淳風兮被九州澤漸四海兮淡悠悠
蕩我憤兮舒我憂還精神兮從君遊獲我所兮夫何求

長生殿賦

銀箏玉笛秋風涼羽帳珠簾秋夜長纜明河於綺樹兮
留壁月於雲牕笑牛女之辛勤兮徒終歲以相望樂千
秋而無極兮願日月之齊光銅龍咽兮漏遲良宵悠兮

未央華清曉浴溫泉香馬嵬暮別愁蒼黃九河東傾泰
華裂六龍西遊天地荒悵翠華兮再來颯玄鬢兮已霜
感舊誓兮徒存念伊人兮不忘奏梨園之法曲舞月殿
之霓裳音樂紛兮具陳祇切心而斷腸撫香囊而永嘆
兮涕淫淫其如霰傳海外之九州兮竟茫茫而誰見彼
鈿合與金釵兮何如甘泉之親面嗟方士之殷勤兮亦
誕幻而非真悟風花之散落兮豈四時之長春要千齡
而萬代兮共委骨於窮塵何君王之不達兮抱荼毒而

傷神嗚呼鉛華一身兮瘡痍四海苟褒似之不作兮豈
驪山之遽敗無鹽醜而齊興兮太任賢而周大彼玉環
之驕淫兮覆唐家而奚怪何君心之眷眷兮未忘情乎
餘愛過離宮而一弔兮增騷人之永慨賦長生之私語
兮庶後生之足戒也

鳴鶴賦

夜氣蕭索靈宮肅森紛青松之墜露靄素月之流陰
有九臯之靈鳥乃於焉而抗音振霜翮兮翹碧脰側

朱頂兮張玄襟引圓吭以孤唳吸沆瀣而長吟氣高亮
而非怒聲清哀而不淫大若聞孫登之長嘯細若和師
曠之鳴琴愁白雲於蕙帳生悲風於桂林望瑤池兮天
杳杳思玄圃兮路沉沉婉轉悽惻有感人心王子對之
而嘆曰噫胡為而然也吾聞物不得其平則鳴豈稻粱
之不足將虞人之見驚爾食不過數掬爾飲不過數升
朝秋風之蕙圃暮明月之華亭爾生優游兮易遂爾性
逍遙兮易寧乃自貽乎伊戚戀鷄鶩於柴荆縱哀鳴之

動天諒誰察乎幽情紫極九重碧山萬里有草名瑤有
泉名醴驚驚同棲鸞鳳共匹爾心安兮無爾累爾一鳴
兮衆仙喜人間兮日暮歸來兮已矣

遊太清宮賦

越丁卯之孟夏醉南風於譙樓晝夢羽人蹁跹西來驚
物外之浮丘忽顧予而長嘯指僊境以同遊予方問其
姓名而清風颯然杳不知其所由也覺而告其主人曰
靈應也西四十里有宮曰太清紫氣鬱其常浮子盍往

焉以答神庥於是擇吉日攜香酒登蘭舟沂黃流取金
鱗於層波擷瓊芳於中洲瞻靈宮之峨峨懷往事之悠
悠泊舟登岸酹酒再拜而留焉俄有童顏綠髮羽衣黃
冠步虛行歌風骨脩然者宮之真人張氏也相揖而前
與予而言叩南華之粹旨講鄭圃之遺篇清歡既洽欣
然忘年予悟而嘆曰疇昔夢中之過我者非斯人耶信
茲遊之有緣遂相與歷前後覽古跡弔銅駝摩金狄八
檣亡兮翠蓋空九龍去兮丹砂失蛟龍埋沒兮豐碑隱

隱鸞鶴不來兮靈溪寂寂劫灰不銷春草還碧霓旌絳
節瓊樓玉室悵蓬萊兮安在嗟僊鄉兮此極於是攀桂
叢倚壇石感今懷古相對太息真人曰興亡翻覆天地
之數也聖人固知其然矣昔周德之衰西游流沙卒之
中國戰爭如麻瓊宮九重青雲紫霞萬僊俯趨維帝之
家下視人世蟻穴蜂衙廢興萬變何足言耶昔在承平
繁華鉅麗鑾輿降香百神陪位玄風振揚薰陶一世而
聖人之道初不加益火焚崑山玉石俱燼荒涼無餘而

聖人之道初不加損臨風感嘆不能忘懷者知吾子世
情之未盡也遂歸宿乎宮中是夜也麻姑送酒子晉來
過玉笙吟風醉舞婆娑飲酣樂極起而為遊僊之歌歌
曰天風渺渺兮白雲輕跨蒼鸞兮遊玉京繁華夢兮已
寤金鼎丹兮未成願玄君兮相接超天地兮長生歌闕
飲散明河爛爛天明告別登舟而返

愛河賦

愛河滔滔兮欲海茫茫濟無舟楫兮又無津梁鼓風濤

之千丈溺一世而堪傷偉聖人之登岸兮何道力之非常澹靖處以永思兮得聖禹之神方下行其無事兮超物我而相忘變恠伏而日遠兮龍圖出而效祥因溯流而尋源兮室懷襄於濫觴升崑崙之玉峯兮振霞裾與霓裳笑琴高之赤鯁兮終未離乎陰鄉目愈高而觀渺兮等萬物於毫芒吸莽星之逸彩兮漱浩月之流光咽三清之瑞靈兮餐五色之朝陽洗予心而換予骨兮俾余壽之靈長下視愛河之飛塵兮欲海涸而生桑乃翻

然而歸來兮樂逍遙兮其未央

困驥賦

并序

向在燕城吾友邵伯誠作困驥行以見示予因廣其
意作賦以答之

房星兮降精蛟龍兮化形或出於渥洼之水或生於大
宛之城虎文兮炳煥鳳膺兮寬平蘭筋兮權奇汗血兮
晶瑩首如渴鳥尾如流星振長風而一嘶歟霧起而雲
生是宜紫燕讓步驂騑避名耀錦韉與珠絡具和鸞與

繁纓隨仙仗於天苑侍翠輿於後庭朝燕秦而暮楚輕
四海以橫行奈何伯樂不逢涓人未值困虞坂之長途
下鹽車之雙淚氣霜雪以悽慘色泥塗而憔悴既饑渴
之內迫復鞭御之外制前丘陵之崔嵬後坡陀之迤邐
望浮雲兮天遠悵帝鄉之迢遞念倒行而逆施畏白日
之西匿彼中心之謂何銜冤苦而實多雖追風之未試
固駕蹇之殊科有能嘉其力之方壯察其疾之匪他飲
以醴泉之流餒以崑山之禾御以黃金之羈鳴以紫玉

之珂猶足以陪八駿而升瑤池追天駟而超雲河也

螺杯賦

有平生之故人招宴飲而婆婆出奇器以示予狀非象

而非犧

音莎

文章爛其自然異良工之切磋孕隋侯之明

月象七星之森羅擎素手以微重酌香醪而不頗厥名

之所以乃滄溟之寶螺衆傳玩而稱珍咸嘆息以摩挲

兕觥質而懷慚金鍾俗而見訶陋椰瓢而弗取况刻橙

而卷荷當其晦泥沙而不耀混腥風於龜鼉足知登華

堂而見重與玉笋以同科信貴賤之無定係遭逢之若
何彼有白髮釣於渭濱胥靡築於巖阿或牛衣之卧泣
或樵擔之行歌方其時之未獲咸汙辱而坎軻迨一朝
之見用名垂世而不磨觀萬物於天地諒紛糾之實多
雖聖賢而且然矧庶類之么麼悟行藏之有命宜順天
而委和於是主人笑而起舞惜白日之蹉跎再酌金樽
重捧青娥歡情既洽衰顏既酡遂乃倒玉山於座側訪
珠宮於層波招泉客於鮫室弔騷人於汨羅濯予纓於

滄浪沐予髮於咸池

陀音

控長鯨之偃蹇跨蒼龍之逶迤

陀音

約琴高以並遊拉處妃而相過心娛樂而未極忽醒

覺而匪他怪斯夢之近誕豈尤物之成魔噫但能伴予
身世之兩忘寧不勝於戰蠻觸之干戈耶

離憂賦

若有人兮在青天之一隅超獨立而無朋兮歛羣芳而
自娛佩琅玕而服明月兮裁青霞以為裾懷真符而欲
獻兮顧君門而躊躇奏軒轅之靈瑟兮固齊竽之不如

紛時物之變遷兮獨歸期之愈疏
蕙草歇而春闌兮浮雲生而日暮
烏投林以求安兮牛羊歸而復路
何所思之難覲兮奈關山之回互
秋瀟瀟而多悲兮春綿綿而多愁
晝鬱鬱其不樂兮夜漫漫而懷憂
夢相從而笑語兮恨晨鐘之不留
念始生之無知兮左提携而右挈
共嬉游以晏處兮又誰知夫離別
何彼懼之難持兮而此恨之易結
考人生之始終兮固悲長而樂短
陰陽運而莫知兮日月窮而當返
涼風颯以中人兮霜露淒其將

晚望神京而不見兮增萱堂之拳拳
宣鴻鴈之無書兮
柰離憂之經年嗚呼已矣哉明珠穢於泥塗兮瓊芳翳
乎蕭艾蛟龍蟄於坎井兮蛙蚓鳴乎江海谷生兮幽蘭
澗濯兮流泉抱琴書以歸來兮願終老而欣然

過銅雀臺賦

過魏武之遺宮兮登銅雀之故臺
悵古人之何在今兮漫
今人之興哀覽山川以四顧兮
弔英靈於一杯當其虎
戰龍爭雄風蓋世移漢鼎以都鄴
奄中原而稱制三十

六宮繁華佳麗月袂雲裾蛾眉鳳髻謂當年之歡晏可
千秋而萬歲何雄心之不待忽一朝而長逝嗚呼自古
莫不皆然兮何分香而賣履留連泣涕笑君王之不達
而獨眷眷於生死之際也漳河東流兮不復回君王一
去兮安在哉餘臺中之嬋娟望西陵而徘徊秋風寒兮
摧畫欄之桂樹夜月明兮照輦路之青苔碧雲暮愁歌
舞絕玉骨成塵恩愛歇惟斯臺之崔嵬表惡名兮不滅

五古

青崖

青崖五峯秀絕壁千仞險中有羽人宮雲霞深閉掩真境既邂逅塵心自收歛借問庭下松風枝為誰颭
遊山日已晚羽客留我宿但覺夜深寒焉知雲滿屋嗟予晚聞道衰老坐相促金丹可長生從此遺世俗

晚坐

危亭落日盡四望蒼煙昏手把一卷書坐倚青松根掩書念世事心如波濤翻婦不知我意但怪我不言呼兒

謂我醉遶衣尋酒痕一笑歸茅堂寒燈照空樽

日落樽酒空盤餐亦蕭然吹燈坐中堂呼兒使來前一
誦山鬼辭再誦招魂篇騷人去我久此意誰與傳悠悠
乾坤內吾道長迢迢

遣興

吟詩不須工讀書不須博悠悠襟抱中適意有餘樂功
名一野兔何用千人搏淵明絕紛華子雲終寂寞古風
日已息聖道日已薄茫茫天地中吾行欲誰託萬事默

已定輕進孰非錯君看桃李花春風自開落

瓶聲

水火本相尅陰陽不同調誰令坎離交變化生此妙笙
簫起瓶罌律呂隨感召天憐詩人窮賜樂助吟嘯聲來
無何向氣泄混沌竅喧寂孰使然炎涼自難料安得浪
翁來相看同一笑

彭蠡阻風

北風吹彭蠡白浪如銀山繫舟巖邊樹數日絕往還我

心急東歸日夕憂在顏仰羨霜空鵠高飛渺難攀古人
成垂堂我行何險艱白雲五老峯上有高人閒長生儻
可學絕粒超人寰

繫舟青山下日暮無所適遠採南澗蘋薪松煮白石悲
來叩舷歌夜半山鬼泣天明望前洲煙樹何歷歷有酒
當典衣勞此舟中客

古風三十一首

美人黃金梭鳴機白玉堂製彼西蜀錦文彩紫鴛鴦錦

成何所用言將貢君王日織不盈寸梭飛空自忙臘天
晝苦短早晚實君箱我有一疋鯁五丈素且光上可為
君衣下可為君裳獻君懼不售徒為塵蠹傷

其二

亭亭山頭樹秋至亦已黃玄猿據其顛老鷄巢其傍丹
鳳引九雛營棲獨皇皇嶧陽有孤桐淇水多修篁鳳雛
日已大鳳毛日已長會當凌紫氣去爾遠高翔

其三

北風飄大荒榮華颯衰老薄暮登高原飛蓬蔽長道高
樹葉脫盡山林曠如掃故園蘭與菊生意何草草

其四

羲和鞭六龍往返無停輶朱顏不再壯綠草颯已秋繁
華東流水中涵千丈愁百年黃金屋萬古同山丘日夕
北堂上酣歌獨綢繆

其五

吾觀天飛龍伸屈亦有時當茲雷電辰變化何神奇崇

朝雨天下四海生華滋火蟄玄陰閉衝風結天池僵卧
蚯蚓窟雖靈復何施

其六

客從東溟來遺我青珊瑚煌煌生九枝貯以碧玉壺我
欲厚報之問客之所須客言無所須與子長相娛別來
今三年德音炳不渝鬱鬱不得見迢迢隔江湖

其七

登高望滄海波浪天漫漫中有萬里黿首冠三神山長

戲動修鱗海搖山不安我欲膾此鼇散為萬國餐佳月
結修餌雄虹裁釣竿泰山為礪石起坐堪盤桓惜哉未
得往撫志增長嘆

其八

天如紺珠碧星如撒沙寒浮雲何處來妬我白玉盤萬
有慘不芒風露氣已溥川途不可越歲暮衣裳單起歌
望雲漢遊子何當還

其九

崑崙有鷲鳥稟質異尋常所居未得儔四海空翱翔不
暴於燕雀不媚於鸞鳳充之以元氣飲之以瓊漿安得
萬里鵬相呼戲神塲

其十

我欲賦遠遊飄飄凌九區尋仙過碧海謁帝朝蒼梧騷
人忽已遠高興與誰俱虎豹守九關荆榛蔽前途直行
傷我馬曲行摧我車已矣歸去來人間正崎嶇

十一

蘇秦古辯士涉世亦棲遲歸來無黃金妻妾坐相欺一
旦相六君志氣何歲挺高車擁飛蓋六印腰間垂丈夫
四方志伸屈自有時悠悠市曹子一笑爾何知

十二

悠悠山陰路曲曲遶澗岡所思一美人邈在山之陽獨
立松風中蘭衣蕙為裳崩崖絕千丈欲濟無飛梁狐狸
雜猩狖悲嘯向我傍日暮迷中途吞聲獨徬徨不得從
之遊歸來安故鄉

十三

悠悠復悠悠日月春還秋萬古一白髮縈纏無限愁
明堂構霄漢棟梁生澗幽悲歌上高原目送長江流

十四

白日何短短蒼天何茫茫死者狐狸穴生者螻蟻場羽
衣崑崙客授我長生方攀星厓明月相將朝玉皇

十五

三山鬱嵯峨隔彼巨鼇波茂陵無仙骨樓船將奈何我

友安期生騎龍每經過天機禁泄漏醉語醒還多

十六

蛟龍蟄南山下有千歲骨雷雨翻太陰還精化神物化作龍泉劍時向人間出終當戮鯨鯢為君靜溟渤

十七

不踏利名場豈知塵土腥不舐丹砂鼎安知鷄犬靈洗心海水碧照眼雲山青拂袖歸去來壺中可長生

十八

采菱涉秋水停橈宿中浦持芳媚永夜獨倚青楓語月
落風蕭蕭佳人悵何許

十九

醉出芙蓉城遠縱瑤臺步桃花隨流水誤到紅塵處
驚天風急不記來時路世網何湫隘流光易遲暮終當
跨靈颺翩然却歸去

二十

竭從朱陵北欲詣紫臺西雷公召玉女風雨忽相迷低徊

黃塵路污我青霞衣回首闌風苑壅隔悲虹蜺

二十一

玄鶴在空山風露警長夜哀聲聞九天羣仙為之下翩
然闌風遊接彼青鸞駕幽人方外心何愁知者寡

二十二

碧梧生高岡上有雙鳳凰一鳴國家盛再鳴宇宙康自
從周衰來千載秘祥光但見南山樹日夕啼鵲鷦

二十三

金
卷一
幽林生紫蘭空谷隱瓊芳美人春闕草採摘入羅裳不
知根本異但愛枝葉長蘭芳委庭戶野艾薦中堂所以
南山松歲暮甘風霜

二十四

美人金屋底手持古刀尺綺縞紛在眼徘徊裁不得東
鄰有貧女蛾眉人未識空懷補袞心悠悠日還夕

二十五

佳人拾芳草遠至清江湄素手擣芙蓉拾彼青楓枝

白日忽已晚，筐篚盈何時。我有傾國蘭，種之正在茲。不
隨桃李芳，馨香自扶持。可充君佩服，道遠莫致之。故園
清霜暮，空餘楚臣悲。

二十六

窈窕閨中女，容華正當年。貞心殊衆好，孤芳陋羣妍。佩
蘭服秋菊，當戶理哀絃。幽響來悲風，清聲凌紫煙。六馬
皆仰秣，游魚亦潛淵。借問彈何曲，陽春白雪篇。曲終佳
月晏，所懽邈雲天。悠悠白日暮，忽忽青春捐。朝朝事膏

沐夜夜耿孤眠豈無梁鴻輩不嫁惜嬋娟

二十七

朝採山上薇暮採澗下蘋
薪松煑白水聊以永斯辰
歲晏霜露深採掇常苦辛
豈無陸海味為我具八珍
豈無羅衣裳楚楚華我身心
自有存狗物違天真日斜上
高臺援琴思古人

二十八

隱居非吾志媚世非吾心
願攀西北雲謁帝瓊宮深還

將太庭曲一和薰風琴坐令四海內擊壤同謳吟陋哉
蘇季子辛苦為黃金

二十九

蛟龍蟄何許歲暮南山陰北風吹天池霜霰忽滿林落
日氣慘澹幽松傳悲吟大運不可常泥蟠豈其心浮雲
在寥廓碧空沈沈何當借風雷起作傳說霖

三十

丈夫當自食待哺實所羞君不見鴻鵠浩蕩四海游又

不見燕雀藩籬日啾啾鳳飛凌千仞龍出雨九州君看
壯士懷寧有饑寒憂萬里亦可封一死非所謀高歌
問時人世上誰公侯

三十一

白日回青春東風扇陽和寒蟲啟幽蟄飛鳥鳴相過物
生善得時我樂亦無他西北有美人高樓奏絃歌一唱
千黃金歡娛誠足多江風日暮起吹落園中花樂極哀
還來惆悵將如何

雜興七篇次陳公望韻

吾觀聖賢心出處皆自然世人昧天機妄意夔憐蛇白
屋未必愚青雲豈皆賢丈夫四方志憂患坐相纏起舞
明月下長歌北風前意闌夜方永歌闌心莫傳騷人儻
可作更賦招魂篇

我本山林人衣冠厭色裏歸來一念靜稍銷利名火富
貴多危機功名足奇禍細觀秋毫理未覺秦山大

行歌出門去悠悠上高臺悲風吹曠野四顧但黃埃臺

邊負戈子新從征戰回從軍今十年田宅盡汙萊耳目
異聞見人生良艱哉我欲排闥闔獻言白玉堦飛符召
六子陰陽使和諧鴻恩瀉滂沛姦惡剋崔嵬功成四海
安却返人間來斯志恐未必臨風重徘徊

幽人愛蘭蕙種之近門牆馨香隨風發郁郁聞我堂披
衣起中夜結佩以自強美人隔千里旦夕成憂傷殷勤
折餘芳欲寄巫山陽行雲渺何許月落山蒼蒼

茫茫蒼江岸有客行求珠為言江路難十步九崎嶇水

深蛟龍惡歲晏非良圖我有山中薇歸來吾汝俱秋風
長缺歌不為馮驩魚薇蕨雖瘦人猶堪以全軀殺身易
五鼎傍人為嗟吁不見東陵侯自把青門鉏

佳人拾芳草日暮南山下所思鬱不見奈此漫漫夜豈
無三星在寒光自相射我歌行露章顧慚周南化瓶沉
青絲引鹿死白茅藉君臣苟自疎予車何由駕鳥雀寒
依樹牛羊暮投舍佇立睇行雲幽懷欲誰話

悠悠南山雲巖谷自吞吐凌晨步青天日暮不成雨六

月東方旱行人口生土沉沉碧海底豈無雷霆主顧無
變化姿從龍安用汝

梅園雅集示同遊

寒梅吐幽花不作桃李態有如避世士遠立塵埃外時
無孤山翁誰與同此愛安陽二三友好事真可賴携酒
許君園訪梅非訪戴清興良未終芳華豈常在折枝寄
何人日暮增永嘅

至元十三年寄平陰縣段郁文

佳人隔青山可愛不可見
明月一杯酒秋風兩荒縣
昨日平陰吏歸言見君面
能無一封書慰我長瞻戀
別來不可說世事雲千變
家門足凶禍萍梗悲流轉
鬱鬱負志高悠悠慚身賤
間來卷書坐點檢平生遍
只有歲寒心忠誠金百鍊
途窮霜露多歲晏遊子倦
日事迫糊口功名絕攀援
江山梁苑筆得似聊城箭
縫掖世所輕瓊瑩衆方羨
高詠考槃詩經綸付時彥

謝田呈漢卿廉訪

書生命窮薄見戲造物兒遂令九州內無地可置錐萍
梗逐風波漂流當語誰君侯持使節繡斧霜風吹雄襟
激高義故舊無棄遺相逢顧盼間賜我田連陂歸耕既
有日土著當從茲賣書買農具及此春雨時他年盤中
餐粒粒知恩私

記夢

琴高古仙人知我千歲後昨宵夢中來微言笑相授手
把青芙蓉神香滿襟袖嘆我良辛勤深埋世塵垢碧海

龍可乘蓬萊藥方就欲與汝同歸逍遙超宇宙再拜謝
未能吾親正高壽但得了晨昏誰能厭凡陋夢覺風颭
然西牕月如晝

九月十三夜夢中作

吾不羨世長亦不憂世短乾坤在吾身今古猶夜旦今
登崑崙顛一笑了萬變好風從西來浮雲眼中散

白雲洞

古洞誰所鑿白雲自舒寫泰山統萬靈安知無守者古

稱膚寸合崇朝雨天下云何三年旱不一見揮洒何當
驅雷霆沛然周四野

弄水巖詩

白雲滿西溪不浣杖屨塵誰知空巖下弄水有幽人我
來觀題名物在跡已陳磐石臨清泚小休勞倦身飲罷
猿鳥去濯纓得相親一曲滄浪歌清風及隱淪從教桃
花片流出山中春作詩示同遊澡德期日新

我愛西溪水泠泠響佩環偶逢蒼石坐聊對碧波閒塵

土逍遙外珠璣播弄間濯纓人不見猿鶴怨空山

三溪此最佳每到歸輒懶綠樹相留連白雲共蕭散雲
根有寒泉注潭潭已滿雖無塵纓濯亦足供漱盥題名
彼何人意長浮世短取酒澆蒼苔今古付一莞

別家辭書贈公澤通甫二老兄庶知區區之心
非樂遠遊而浪走者也

吾親在喜懼理不合遠遊誰令萬里餘泛此江湖舟鬱
鬱英雄心貧窮非自由上念甘旨闕無以供晨羞中念

喪事重葬未歸墳丘下念二猶子室家事悠悠悲歌起
中夜淚下不可收皇天照此心巧宦非予謀抱關而擊
析祿薄可無憂他年吾事畢高卧雲林幽

過竹溪

竹溪徂徠陰幽邃有佳趣當年唐六逸盤桓此其處高
情繼煙霞觴詠遺世故出處士大節正要安所遇寧為
南陽龍不憶東門免陰陽運否泰治亂關氣數乃知賢
達心於世本無預溪竹綠益繁溪流清不污歸隱誰我

同懷人日空暮

題竹溪清曉

溪竹擁蒼雲溪流漱寒玉中有避世士歲寒甘幽獨浩
歌風露餘撫此萬竿綠七賢不可作六逸誰當續榮華
易零落世道多反覆抱琴歸去來春風謝華屋

巖巖亭

嶽麓多道宮亦有阿蘭若登臨論形勝無若此亭者北
瞻三觀高左右寒溪瀉南揖徂徠峯蒼煙帶平野吟懷

豁空曠爽氣極瀟灑當年構者誰用意何高雅惜哉歲
月深風雨飄敗瓦樵牧休其中牛羊宿其下我心思起
廢但恐隨者寡夕陽久徘徊欲去終未捨

雪後遊西湖

湖山明霽雪逸興生扁舟一棹入空濶孤吟消百憂珠
宮映貝闕瑤水連琨丘我無神仙骨安得有斯遊欲起
孤山翁一樽同獻酬再詠梅花句清風動巖幽高懷寄
千載世事真悠悠

題諸葛武侯帖

堂堂卧龍公人物冠千古手提虞淵日志欲還正午長
星隕中宵遺恨塞寰宇誰云儕管樂自可配伊呂借使
書不工猶當寶遺楮君家二十字得之自何許氣勢逸
且豪龍鸞騫以舉奇寶神所貪隄防六丁取相傳儻非
贗千金莫輕予

原註帖云師徒遠涉道路甚艱自及
褒斜幸皆無恙使回馳此不復一一

種雲

買田秦山下石多如羊羣造物為我耕種之皆白雲涵

湧初鬱勃散漫還氤氲收歸方寸間吐作五色文一笑
顧妻孥未用空愁困

遊竹林寺得影字韻

石徑俯雲壑竹林閔幽境寺古僧徒稀山深風氣清
游未終興白日忽倒影曳杖披暝煙長歌下前嶺

又雲字韻

竹林古招提佳勝夙所聞偶同二三友行盡西溪雲
身清涼境超然謝塵氛山僧老煙霞慣與猿鳥羣客來

問不應但誦貝葉文真空竟何有憐爾徒辛勤寒風起
陰壑白日忽已曛詩人有遺韻聊為英靈分

招巖客

漸漸山間石壁壁澗谷路修藤復綿逶行人那得度猛
虎蹲我側豺狼饑復怒雄虺獍九首蝮蛇長如樹北
風飄林薄僕馬悲狂顧寄謝山中人歸來恐遲暮

送鮮于伯機之官浙西

千將刺犀象驂騑日千里鉛刀與駕駟擾擾徒為耳君

看才傑士超拔亦如此我友西溪君高明氣雄偉經綸
富奇策學術有源委筆落驚鸞翔文成訝翻水跌宕詩
酒餘風流笑談裏予遷廣陵居得與君密邇誓將千頃
波一洗塵心鄙春風送離歌又見行軒起福星照吳越
重為斯民喜報國當盡心安人貴修己豺狼掃貪暴蛇
豕除姦宄遠志期騫騰清名慎終始東南富佳麗湖山
況清美堂堂謫仙翁

謂仲方也

久矣望吾子公餘有新詩為

我寄雙鯉

遊靈巖寺

靈岳走西北連峯鬱崔嵬中有古佛宮地勢深還回蒼
煙萬木表金碧出樓臺山僧喜迎客笑捧松醪杯憩定
導客行登臨共徘徊題名滿石壁歲久昏蒼苔天風收
白雲千仞矗丹崖初疑赤城現又訝朱陵開清泉甘若
醴流入廚中來峨峨五花殿締構真奇哉壓雲亭最高
晴空嵐氣埋扶筇立絕景亭名萬象生吟懷方知此形勝
當為天下魁佛界長清涼人世多塵埃吾非西方學幽

隱心所詣詩成出山去猿鶴空悲哀

孤山訪梅

春興生杖屨訪梅孤山顛道人庭宇靜清香自留連有
懷和靖翁仙去今幾年妙句不可續風月空山川饑餐
石上雪渴飲巖中泉手持白玉英孤吟下寒煙佳人遠
莫贈日暮心飄然

梅花如高士獨立遠世氛春風不敢狎桃李安能羣寒
雪羞素質幽蘭避清芬詩人慰寂寞踏破山中雲折花

心搖搖無計遺東君

送李叔謙并序

叔謙郇城後進之秀也曩游京師館於廉相之門近
以事還家嘗過余書齋與之語通達不滯甚可奇也
今復治裝而北就余為別義不可無言因走筆賦詩
一章以送之都下見王生國華者舊從學於予者也
當為一示

大厦遺棟梁長松老幽壑天風起羽翼冥鴻在寥廓人

生當俟命窮達何憂樂京師豪俠窟勢利紛酬酢子有
賢主人堪為歲寒託既許門登龍定將書薦鶚道義終
始間誠心貴無忤嗟予疎懶者夢斷平津閣有懷未忘
言因行道其畧

蘭軒集卷一

欽定四庫全書

蘭軒集卷二

元 王旭 撰

五古

漢柏

白雲泰山麓有柏森仙宮其大蔽牛馬其高攀蒼穹枝
幹老益堅摩挲若青銅我來問故老因得知始終漢帝
昔封禪侈心秦比崇乃於五松外興此栽培功至今千
載餘盤鬱勢愈雄爭知茂陵上無樹起秋風乾坤俯仰

內日月興廢中英靈為護持不逐劫火空無意棟明堂
何心俟良工詩成重徘徊遙憶杜陵翁

人家種榆柳得力一何早首尾十年間森然已連抱匠
斧隨所用何嘗到枯槁蒼蒼泰山柏漢物傳故老養材
今千歲造物非草草腹朽半空虛根危欲顛倒明堂何
時構日月難永保物生有盛衰時至無醜好倚杖三嘆
嗟誰能測天道

旅懷

平生心閒事未了不得閒驅馬踏落月悠悠度荒山木
杪風淅淅石根水潺潺山川有奇句盡在行役間自我
別家來三見月半彎懸知北堂心日夕望我還念此心
若飛有句不暇刪

題陳魯彥肅齋詩

人心不可放唯敬斯長存用力當何如以肅為入門竦
然一念間正立百邪奔靈臺自清明安得惑與昏暴慢
由此遠德性由此尊有如金天氣消彼春陽溫盡將物

精華收斂歸本根天人無二理造化同一原大哉肅敬
功未可造次言陳君士林秀為肅名齋軒勉旃毋自怠
聖學此淵源

有感

太古衣鳥獸公私兩無規逮乎蠶之生食葉吐柔絲絡
緯上機杼羅綺遍天涯官心益貪鄙盡取無復遺蠶婦
辛苦餘雪霜無完肌安得還太古各衣鳥獸皮

送劉經歷

天平古名郡選治須時英君來佐蓮幕婉畫煩經營愛
人本學道氣象寬以平胃中秋月懸筆底春風生三年
如一朝可見不息誠餞行洗離腸酌此汶水清芳樽豈
無酒取醉非君情

魯義姑廟

荒涼道傍祠荆布知誰氏相傳魯孀婦制行高百世逃
生迫干戈割愛明信義大者前妻兒夫子令拊字幼者
已所生臨危甘捐棄生死全一諾幽冥要無愧誠心動

乾坤齊將兵亦退斯人雖繼母用意何獨異擬蜂伯奇
逐歸昨申生繼滔滔二千載義躅嗟誰繼何當繪遺像
遍向人間置庶使罵母心觀之減凶戾

晚菊

分韻得
國字

風霜歲已暮孤芳為誰妍蕭蕭憔悴餘怪此節意偏倚
猗翠莖踈粲粲金英圓幽賞歡後時荒畦卧寒烟日夕
有騷人療饑荒叢邊落英不滿掬相對空淒然

通玄子壽堂詩

世人紛嗜慾慾以喪其真至人獨清靜靜以全其神真
喪形幾何神全壽千春古來長生者此道實要津吾觀
通玄老清靜超羣倫逶迤道德中隱几幾忘身明日闕
九淵返照無纖塵湛然方寸地長守羲皇醇霜雪凋六
合不敢傍松筠方瞳一百歲服鍊初無因厭世不肯住
歸為玉皇賓清都眇何許徒慕區中人傳道道常在著
書書已陳只應千載下名與日長新

崔吉甫慶親八十之壽

人生願長年天命豈力為古稱仁者壽斯語不予欺崔
君古循吏有親仁且慈康寧登八袞春氣浮鬚眉施隆
報必豐善慶壽亦宜綵服捧霞觴侑以南陔詩仙桂枝
已茂靈椿陰未移融融天性間樂哉復何思

滕州王氏慶雙親八十之壽

悠悠東溪水源深流派長彼美溪上人種德溉其芳所
積非一朝宜哉神降祥五福壽為首非天人孰強翁媪
如畫圖白頭坐中堂問年過九九康寧殊未央春風吹

綵服綠酒開瑤觴山川助元氣草木浮輝光只應仁者
里便是長生鄉我歌偕老詩和以白雲章青天望黃鶴
寄贈滕東王

雜詩

青青南山樹託根一何高雨露雖早承風霜亦先遭修
榦拂雲漢清陰蔽猿猱歲寒枝葉盡樵斧將焉逃

煌煌珊瑚樹託根萬仞淵陽光照羣物海底無青天絕
寶世所稀幽沈多棄捐誰能理鐵網採獻君王前

扶桑出火日助此三伏威水沸魚不游林焚鳥安歸更
堪晝夜間擾擾蚊蠅飛風霜一朝至豈恤身無衣

讀李公敏集

吾觀李公詩骨氣何老蒼如有渥洼龍千里思騰驤又
如南山松獨立凌風霜不架屋下屋不疊牀上牀言志
與紀實句句出肺腸用事無牽制吐詞多鏗鏘養源自
崑崙可見東流長六經博其趣諸子發其光他時再相
見吾敢輕論量

送趙景鹽使南歸

南國有美人容華粲春輝江山不敢隱貢之侍皇扉朝
浴蕙蘭湯慕被雲錦衣承恩歌舞罷解佩思還歸扁舟
泛炎暑不待秋鴻飛遨遊水晶宮簸弄明月璣白蘋滿
芳洲採勝西山薇人生雖行樂天命豈可違要於進退
間審此安危機酒闌惜離別更取瑤琴揮曲終三嘆息
知音從此稀

王女池詩

來登日觀峯因謁嶽神殿殿側有寒潭甘冽可供薦山
澤本通氣況乃神所眷大旱溪澗乾湛然終不變夜深
詩思渴汲取無人見清涵明月輝冷浸白雲片世味洗
一真華池助三嚙天明再拜歸可敬不可玩

東郊閒步

桓君有別墅近在郭門東今晨宜出游日暖天無風樂
哉二三子杖屨能我同草木藹生意乾坤運神功物我
兩無間一氣春融融寧教酒樽罄莫遣詩囊空詠歌莫

歸來想見浴沂翁

贈崔壽之

崔君性明達有古循吏姿游及簿書間公廩了無私官
僚賴贊助學校資扶持一寸好賢心獨與霜松期三年
鯨川幕行事我所知峩峩則堂翁老筆豈予欺才高處
位下未得盡施為香風藹林谷豈無蘭與芝傾筐委道
周借問採者誰自古卿與相時來則為之天命苟未通
委吏屈聖師用舍非在我行藏復奚疑但當守初志堅

白無磷緇贈君之瓊瑤慷慨賦此詩

送趙克明太守之任城

凡仕非為已所憂在斯民勞心博寸祿受直傭其身此
理甚昭然知之能幾人自從世道衰愈覺民生貧悠悠
古循吏誰復嗣芳塵但見彼貪暴縱橫蛇虎均俯仰宇
宙間我心未易陳趙侯富才術有志存經綸三年佐吾
州一德通明神論政貴無訟聖門知問津寬和守中道
惻怛懷深仁君看甘棠樹勿翦豈無因好將愛物心去

作東南春

初到泰安游佛峪寺

平生愛奇勝，歷覽心未足。今朝復何朝，泰山在吾目。未暇登絕頂，先來訪佛峪。靈境開洞天，清游浣塵俗。時當仲春半，陽氣浮草木。雲烟色蔥蒨，禽鳥聲斷續。仰觀萬仞峯，俯臨千丈谷。徑滑櫟葉黃，棚低松蓋綠。老僧喜延賓，掃榻留我宿。神清夜無寐，衣潤雲滿屋。天明盥玉泉，整駕呼童僕。尚慚纏世網，使我歸息速。山英許相招來。

往從茲熟

喜雨

秋旱野未耕當春猶赤土絕糧半天下蒼生命如縷
帛赴羣望山川遍齊魯帝哀斯民窮呼龍降甘雨君看
一晝夜黃金滿寰宇神功未易議帝力誰敢侮園丘埋
蒼玉瓊茅縮綠醕烈烈山焚蘭坎坎社擊鼓幸免中野
殍報神同歌舞

初夜月照窓夜久雲屯屋喜聽塵夢餘淅瀝鳴松竹三

春未耕種一雨如金玉願龍遵無私四海同霽霖哀愁
變歌舞生意涵草木天晴禽鳥聲處處催布穀安得逐
良農共耕春野綠

江山千里圖

平生愛山水有疾成膏肓勺泉與拳石遇之輒徜徉中
華齊魯郊平陸何茫茫杖履黃塵間此願安得償振衣
賦遠遊十載客南方江行三千里夢繞魚龍鄉如華如
芙蓉滴翠逐飛航匡廬高萬仞秀色凌穹蒼餘者難悉

數高低互相望舉盃我眉亭猶想謫仙狂英靈助吟嘯
浩蕩洗肺腸快哉疇昔心遺恨無毫芒歸來舊書室籠
禽謝飛翔培塿為泰華蹄涔即滄浪遠興無百里雄襟
鬱摧藏閒思舊經行一一不可忘君來示我畫開卷妙
難量江山十年夢喚醒在此堂宛若當日時繫舟巖樹
傍掩卷三嘆息因之遂成章

晚春有懷

東風三日雨雨止花亦殘坐令芳春意悠悠遂無歡幽

鳥破孤寂綠陰生晚寒懷人不可見月出青雲端

晚秋湖上獨行以日暮碧雲合佳人殊未來為韻
人生固長勤世事何時畢聊將山水樂一洗幽憂疾瀟
瀟楊柳風淡淡芙蓉日長歌謝城闕永懷山林逸

其二

幽人出無侶獨行湖邊路湖水清漣漪濯纓此其處引
袂摘瑤草霑裳畏多露已矣予所思佳期恐遲暮

其三

湖邊夜來霜草木非舊色念此感秋人悲吟頭亦白悠
悠逐風波渺渺去鄉國詩成歸興牽山水增晚碧

其四

我愛林和靖高情超世氛不作封禪書祇卧孤山雲妙
絕梅花詩千秋獨有君西湖綠如酒可酹山中墳

其五

身遊江湖上迹與漁樵雜慚非徐孺子可下陳蕃榻古
來豪傑士與世多難合再詠考槃詩悲風起蕭颯

其六

錢塘繁華地山水麗以佳
蘭舟載歌舞遊賞是誰家
北風吹岸草白露凋巖花
此意不可言詩成看昏鴉

其七

芙蓉洗秋露嫋嫋香無塵
我欲折此花遠寄平生人
烟波渺無極道途良苦辛
歸尋桃李蹊坐待朱門春

其八

秋氣行肅殺秋風遍寰區
有生同一衰未覺蕭蘭殊
野

菊懷晚香依依傍晴湖無人共幽賞日晏空躊躇

其九

乾坤限南北寒暑異時氣江湖十月交冰雪意全未偃
蹇高卧心淒涼倦游味故園今可歸何必待富貴

其十

獨吟還獨和清興亦悠哉閒攀水邊樹困卧石上苔惜
無一樽酒招此逋仙來道人期後游笑指梅花開

孫泰山書院故基詩

惟昔孫泰山著書祛世惑麟經晦三傳探討獨有得尊
王名分定返正亂賊息坐令元聖心千載一朝白懷人
不可見訪古戀遺跡我欲祠先生配以徂徠石浮雲滿
空山西風掃無力正邪有消長耳目異疇昔倚杖聽寒
松茲情竟誰識

宋承五季衰文氣早已極天將啟淳源談經起孫石巍
然齊魯間師弟無愧色尊王一書成坐釋麟經惑至今
學者心講貫知用力邇來二百年何人繼其跡故居雖

未毀見者為嘆息天寒孤鳳去日暮羣鳥集回首瞻泰
山巖巖自寒碧

寄子周老兄

鵲鵲自南來遺我雲錦書開緘再三讀言盡意有餘青
山叙舊約白髮悲離居繼以九章詩燦若堆驪珠高懷
放林野與世宜闊踈憂時忽慷慨此心竟何如予衰一
無能道卷不復舒近得至人教反觀忘故吾火宅化清
淵中有金芙蕖風霜不搖落彩色涵空虛懷君未得見

渺若隔江湖何時一晤語撫掌驚樵漁

照蝎

夏夜茅堂空有物緣虛壁幽人坐其下袒裼心惕惕恐
是蠱尾蟲呼兒舉燈索果然黑暗處潛毒伺吾隙殺之
還歷照盡掃無遺跡歸來故坐處拊心三嘆息毒蠱滿
天地於何求安宅殷勤理門戶聊可度今夕

師曠廟

子野晉太師知音古今善胡為有遺祠乃在魯東縣問

俗知其鄉懷賢起欽戀古樂久崩亡新聲日惑眩斯人
不可作雅鄭何由辨客行無牲酒歌詩代陳奠感慨千
古心因之此中見

挽楊庸齋先生詩

我於天地間知有庸齋名道德施一方鑪錘造羣英燕
山幾還往登龍負平生皇天不憖遺此恨終難平賴有
嗣人賢煌煌宏厥聲南來一傾蓋氣宇何高明讀書百
家盡下筆四座驚乃知元氣在未覺鱣堂輕公乎可無

憾世業方崢嶸

文廟種栢

分韻得
強字

東風五侯門桃李搖春陽幽人歲寒心獨為松栢忙
剗山破烟霧移種成新行遠色帶林壑清風生廟堂
鬱鬱龍蛇姿未滿三尺強我來日摩挲恐被兒童傷
養之以雨露成之以風霜參天二千丈他日殆難量
題詩貽後人著意護棟梁

人生七十稀栢生千歲強種栢待其成汝生寧獨長不

如種桃李三年滿春光春光亦能幾過眼旋消亡落落
大君子作事超尋常拔桃樹松柏遠意誰能量寒烟生
泮宮翠色來山岡森然如兒童羅列成新行身猶短荆
棘氣已含風霜坐着龍蛇活行當鸞鳳翔但恐種柏人
他年遊四方不見枝幹成風雨摩穹蒼作詩告後來愛
惜無摧傷後此五百載為君充棟梁

登萃美亭

移家岱宗下日與山相親登臨得佳處來往不厭頻蒼

崖俯西溪攝衣上嶙峋危亭萃衆美構者知何人想見
當日遊曠懷樂天真舉杯一笑罷萬象紛前陳歲月不
相待廢興良有因我來訪遺址時節正殘春闌闌羣鳴
集鬱鬱衆綠新絕壁開日觀寒泉落天紳逍遙一枝節
縹緲千仞身浩歌雲霞上謝彼區中塵飄然隨飛仙汗
漫遊我神此志恐未可歸哉從隱淪

登臨得奇勝杖屨不容懶山風吹白雲野服稱踈散危
亭今何在翠嶺烟霞滿悠然物外心會者應亦罕浮世

黃塵深青天白日短且將山中樂供我一笑莞

勝槩亭

為丁仲文賦

山川有奇趣俗子無由知茲亭發天巧借問作者誰令
威古仙伯簿領真游嬉亭成身不居遠與幽人期白雲
朝自閒黃鶴暮何之古來山林士用之王者師孤芳石
上蘭五色巖間芝秋風霜露寒采采恐後時安得一樽
酒歌我山中詩

七古

宋高宗御書扇頭

靖康事遠日已忘武陵花草春生香德壽宮深日月長
思陵天筆超鍾王石碑久湮世無有倬彼昭回煥星斗
劫火焚天鬼神守我昔見之恒拜手歸來一夢墮渺茫
眼前想像蛟龍翔心貪石刻成膏肓况有真迹如君藏
泥金小字青綾扇當年知有南薰殿新詞莫遣歌喉轉
世事何心到游宴白日未招沙塞魂北風又散吳山雲
興亡有數夫何云一笑且賞書林珍

憶梅得月字

凍雲釀就江天雪正是梅花放時節可憐身世墮塵埃
不到瓊妃白玉闕情隨烟水渡微茫夢繞湖山記愁絕
驛使不來春寂寞南枝雖在誰攀折素衣人去又橫參
畫角聲殘空落月相思一夕腸千結況是天涯又離別
非無毛穎解傳神瘦影寒香終欠缺幾時攜酒花前去
細把幽懷向花說詩成一笑付東風未害廣平心似鐵

行路難

泰山無石海無珠沈沈古井生珊瑚碧雲埋空白日暮
美人邈在西山隅手中萬古軒轅瑟一唱三歎咸韶俱
調高曲古知音少哀哉不及齊門竽

陳氏老人慶八十詩卷

人生五福壽為首七十猶稀八誰有自非積德慶源長
安得天公獨為厚黃金白壁齊山斗難買期頤超輩偶
燕山之陳衆所推好事聲名傳已久今年八十大作慶
想見歡聲動親友堂前蘭玉歌白華堂上斑衣勸春酒

寒松色貫四時青
回視風霜笑蒲柳
君家昆季予所知
禮合稱觴嗟掣肘
他年賦就漆園椿
再拜攜來獻公壽

壽杜元亮

憶昔共游三山東
呼吸沆瀣吞鴻濛
醉中喚起長眉翁
夜上雲漢騎蒼龍
招搖前導飛廉從
手援北斗呼豐隆
瑤池玉醴觴千鍾
浩歌攀損蟠桃叢
叫排閭闔滋不恭
上帝怒勅雙玉童
飛符譴墮塵寰中
摧折要與凡夫同
嗣宗放達嵇康慵
落落與世難為容
簞瓢蕭然四壁空

聳肩孤吟伴寒蟲四十流年如轉蓬依然豪氣飄長虹
摩挲金狄偶相逢握手三嘆思前蹤青天漫漫碧海重
仙籍未除終許通靈根廓達必無窮突兀千卷堆其胸
謁來南游興方濃椽筆敵却江山雄清辰戶掛扶桑弓
佳氣鬱鬱還葱葱舉杯致辭前鞠躬願君壽如南山松
願君富貴山比崇圖形麟閣誇元功兒女奕世俱官封
榮華蟻穴矜盲聾何如兩鬢吹天風萬里游獻蓬萊宮
野鶴乘軒鳳在籠悠悠萬事隨天公且看醉臉映春紅

次韻送王知事

平生口不談阿堵却笑黃金築郿塢春風蓮幕過三年
上下情通若桴鼓名場勝負但旁觀未肯梟盧爭一賭
枳叢或可棲鸞鳳兔網安能挂龍虎已識風流返故鄉
空留惠澤霑吾土嗟余浪走成何事十載江湖悲逆旅
今歲歸來時已暮鏡裏青絲變霜縷樽酒相逢一笑間
姓名誤作詩人數感君知我為君吟不覺毫端落風雨

贈陳公望

憶昔往見滄浪翁示我詩法祛盲聾當年門下作者衆
只有君我心相同或問瓊宮飲沆瀣或跨駮駟行虛空
或傾銀河洗明月或掃碧海乘清風相期在遠不在邇
意欲八表超樊籠參商一別忽十年形影隔絕無由通
大江南北浙東西寄食飄飄如轉蓬舊學荒涼誰復理
但覺荊棘生胷中簞瓢還家歲月暮歌和山鬼號幽蟲
北堂親老甘旨闕憂心旦夕常忡忡羨君出處何雍容
聲名藹然道義充浴沂歸來有真樂性天心地俱春融

今之隱几非昔人海山何止移琴工學海波瀾有餘富
文場旗鼓誰爭雄徵書飛來天九重玉堂東觀論亦公
風淫末疾行當愈但恐三徑留無功天球河圖非世物
不置清廟將安庸嗟予碌碌負初志徒有白髮悲兒童
塵編萬卷守環堵茫茫道體深難窮如乘一葉入滄海
浩蕩四顧迷鴻濛三生書債償未了鄙質正賴君磨礱
區區此意何所似韓公之雲東野龍願得世間無離別
四方上下長相從

贈潘景山并序

景山潘君妙星厯之學言禍福如指諸掌為予推行
年深有感於心者臨別書此以贈

江南術士如繁星就中景山孤月明
竭來相逢一樽酒
議論滾滾江河傾此人
胸中涵太清象緯度數窮縱橫
陰陽一氣貫五行萬物稟之然後生
大而國家小而物
氣數榮悴無差爭君從何處傳此學
大小不遺俱妙精
如燭取影鑑照形禍福指掌令人驚
天生我辰今安在

半世空亡事不成為言金木相尅害不但箕斗徒虛名
扁舟勸我北歸去歲暮冰雪方崢嶸他時相望二千里
客星定憶嚴君平

至元二十二年九月二十五日早過燕南盧溝
橋

天星寥寥霜露寒行人早起衣裳單野烟如水白不散
山月照衣黃色殘黿背橋高馬蹄滑羊腸路澀車聲乾
十年來往燕南道客裏情懷長草草黃塵老盡英雄人

千古西山為誰好

江山千里圖

大江東流渺無窮羣山夾峙何青蔥江山形勢幾千里
一旦落我書堂中我知畫者非庸工雲夢八九吞心胃
想當盤礴下筆時變化慘澹愁天公憶昔扁舟泛南國
醉魂飛遶馮夷宮蒼崖冥冥嘯虎豹白浪浩浩吹蛟龍
歸來閉門心不樂登高却羨南飛鴻會當續我遠遊賦
青鞋布襪隨秋風

蛻仙巖

玉堂遺老滹南翁平生景慕恨莫從著書辨明經史惑
議論至今學者宗一朝東游登日觀笑視八表開塵胃
歸來中途憇盤石遽謝浮世騎蒼龍天風縹緲導笙鶴
弱水不隔蓬萊峯我行道此不能去摩撫短碣懷高蹤
青山千疊雲萬重陰吹浩浩生寒松獨立蒼崖空四顧
神交何必真相逢

謝翟仲寧惠端石硯銅蟾青金筆架等物

文星何年下虛碧化作端溪水中石兩點寒光上下分
猶似煌煌照東壁自從天上失此星萬象昏蒙慘無色
太陰司夜懼獲愆故遣蟾蜍下求覓爬沙行遍山林內
歲暮過期歸不得一朝二物忽相逢脫身來訪鄒城翟
翟公本是不羈人醉眼時嫌天地窄二物淹留心不樂
意欲飄然謀遠適夜深私語君聞知送與蘭軒伴孤寂
蘭軒一見雙眼明傾蓋端如舊相識摩挲三嘆愛且敬
再拜延之為上客几淨牕明春晝永管城脫帽銅山立

共來催促要題詩笑我無非翰林伯鸞坡玉堂天九重
虎豹闔深風雨隔是中有人司帝命揮洒黃麻布天澤
或從太史住東觀褒貶成書繼麟筆策勲二者無不可
奈汝時乖命屯厄蘭軒今為五窮主好古耽奇已成癖
與伊便結三生緣永鎮文房勝珠璧荒詩為謝愧不工
但覺壯懷增感激

猛虎篇

有足莫踏猛虎尾有手莫捋猛虎鬚南山崔嵬壯士死

至今人弔黃公愚平時閉門不敢出日暮況乃君樵蘇
猛虎飽肉牙可捫飛龍厭豢角可馴古來使鬼須銅腥
無金妄動天公嗔窮愁鬱結天地死不教白屋生青春
匣中長劍漫悲吼非時汝亦安能神撐腸挂腹五千卷
贏得兒童唾人面談天說劍三萬言蒼蠅謗語何喧喧
謗亦不足云唾亦不足道人生窮達誰能料君不見白
頭棘津叟一旦風雲起屠釣人生神物合有時未可書
癡論年少

透光鏡

何人鑄此青銅鏡表裏通明玉潭淨開奩却立不敢觀
但見寒光相射映菱花金雀雖有合背面殊形安可並
春風桃李秋蓬藿興廢不知傳幾姓造物攜來落君手
從今世上妍媸定世言回仙曾點藥幻語無稽吾所病
或云當年鼓鑄時日月之精曾感應博物時無張茂先
此事根源誰與訂我有一鏡得之天廣大規模方且正
光明無晝亦無夜照徹乾坤涵動靜玉臺若要丕塵昏

別有神方傳往聖
世間百物總無功
唯在閑邪守吾敬
題墨梅有感

杖藜踏雪西湖路
為愛梅花幾來去
暗香疎影月黃昏
更遣寒枝啼翠羽
十年一夢隨東風
回首清游覓無處
憶梅欲寄斷腸詩
每恨塵埃無好句
他年再與梅相遇
定擬花邊結茅住
江南春色今如何
驛使不來空歲暮
花光老筆通三昧
剩挽陽和發天趣
風神良是昔容非
應為緇塵染衣素
蘭軒幽客避繁華
終日閉門香一炷

瑤臺仙子來何方
病目增明喜如故
相逢便可倒清樽
不須更草招魂賦

秦碑

周亡六國歸秦嬴祖龍
肆欲窮蒼生
禱祠求仙遍天下
翠華萬里長征行
登封直上泰山頂
刊頌功德垂休聲
侈心未極天命去
西歸不到咸陽城
驪山之藏肉未冷
函谷已納諸侯兵
可憐區區亥與嬰
乞死不得為編氓
廢興悠悠二千載
閱世只有山無情
日觀峰頭蒼石屏

我來摩拂叩山英莓苔風雨字殘缺彷彿認得臣斯名
前王失道致顛覆後王鑑之宜改更漢唐以來凡幾君
誇大欲與秦爭衡泥金檢玉竟何事太平粉飾初非誠
唐崖紀號空自銜我心感憤終難平天門回首一長嘯
落日萬壑松風鳴

送杜子榮之官濟南

并序

大德五年冬杜君子榮自太府少監出為濟南治中
過鯨川留數月因得接光儀奉談笑君外若同俗而

中不苟尤長於詩溫麗圓熟入作者之域而未嘗以
自負其風流蘊藉使人樂之蓋可與為善而不可與
為惡者也東風扇暖僕夫告行諸君攀送可廢贈言
之義乎

濟南山水多清輝我思往游願輒違塵埃南北五十載
引領東望常依依杜君本是雲霄客文采風流當世稀
一朝展驥作別駕白晝山川衣錦衣送君此行空健羨
恨不插翅相隨飛人生志在行所學豈是裘馬圖輕肥

舖糟勿羨旁人醉挹彼寒泉有真味吏奸民隱更留心
他日甘棠可無愧

送彭仲英

與君昔作金陵客詩酒高樓醉春色風流雲散忽三年
歌吹相逢廣陵陌春風蘭省姓名香世有雲泥心不隔
錢塘三載尤相得暇日歡遊即相覓西湖烟雨採蓮舟
尚記樽前紅袖濕簿書到手無繁劇經濟才高有餘力
脚底靈槎可上天看君只恐功名迫我自迂踈墮泥滓

千里歸來家四壁，纏心正有夢我悲。不待衰年頭已白，
隱身糊口鄒城邑。木槁灰寒生意息，君來忽若降自天。
入座神光照珠壁，十年聚散江湖夢。一笑停盃話疇昔，
破鏡飛空興未闌。行旌又指天西北，平生故人今廟堂。
青眼望君非一日，我夢清都隔塵世。好趣羣仙朝北極，
更將長策贊經綸。坐使蒼生沐仁澤，不然衣錦却南歸。
猶有清風繼今夕。

觀海

平生愛山仍愛水培塿蹄涔逢亦喜山登岱嶽願始酬
水欠滄溟心未已歲當庚子秋八月偶與鯨川數君子
飄然有此觀海行正值東風暮潮起馮夷擊鼓天吳超
白馬素車來萬里乾坤搖蕩霧雨昏走鬼奔神辨奇偉
可知河伯昔東游向若望洋羞欲死沙邊立馬聽天聲
風雲怒吼千雷霆須臾潮退風亦息但見浩渺涵青冥
興盡歸來天已夕暗思浮世心還驚瀟瀟茅屋秋氣清
夢逐羣仙訪蓬瀛珠宮貝闕延我入注酌玉醴烹長鯨

金支翠旗映歌舞舉手笑謝安期生雄鷄喚人天五更
起觀日出不可停白虹氣射青玻瓈赤玉盤擎紅水晶
水天上下同一色五彩照耀扶桑國六龍促駕不肯留
走上寒空猶帶濕雙眸眩極浮空花不覺潮生沒岸沙
從此胷中有東海問津何必待靈槎天吳躍馬導馮夷
河伯江神首自低日月浮沉為窟宅乾坤軒豁露端倪
蟠空蜃氣千樓閣捲地潮聲萬鼓鼙我欲醉乘風雨去
直尋蓬島跨鯨鯢

登泰山歌

我生齊魯間早聞泰山名塵埃五十載始有今日行鳥
道盤中溪浮雲同上征時節當孟夏風暄雨初晴紅綠
分夾道禽鳥鳴嚶嚶經過蛻仙巖拜酬玉堂英淳南不
復歸春隔芙蓉城屢憇到黃峴脚底諸山平於茲觀岱
宗始見真儀刑壁立五千仞仰看入青冥御帳久寂寞
流泉自清冷天門十八盤步步喘汗併披雲立絕頂回
望還自驚三神之神竟何許但見碧海翻長鯨蒼梧虞

舜叫不返白日慘慘無光晶望中百二形勢強彈丸黑
子奚足爭燭龍銜光照玄野近向掌上窮幽并眼中天
地只如此一笑宜將人世輕高大乾坤五嶽四未到想像
應知昔抗衡須彌載物書崑崙說山經二山極高大豈
不神且靈然皆荒迷九州外且恐寓言難準程爭如茲
山在中國磅礴尊嚴秀以崢自非謫仙之才少陵筆有
句誰敢輕題評夜宿玉女祠天低寒氣生羽人談封禪
歷歷言可聽雄華竟安在千古一夢醒天風起夜半萬

壑松杉鳴欲往觀日出峯危足難停披衣還入戶坐待
東方明取水玉女池調以沆瀣精三漱復三嚙洗我物
慾情願從白雲半間屋鍊此九轉仙丹成下觀人世不
歸去坐使千歲還童嬰從渠爭名復爭利蜂衙蟻穴紛
營營嗟予有志未能遂拂袖空留長嘯聲

明月歌

明月出兮東方衆星淡兮無光有白雲兮飛來暎河漢
兮英英英英兮何為備彩色兮成行北風起兮雲退藏

蕙草歇兮天雨霜嗟所思兮道悠長心鬱鬱兮增煩傷
我樽既酌兮我琴既張獻酬無人兮知音渺茫願明月
兮相知永千秋兮不忘

明月皎兮中天挽風露兮留連有高樓兮美人舞霓裳
兮慕嬋娟袖五色之雲兮騎黃鵠之翩翩招彼月中之
人兮曰何為乎孤眠仙人笑兮不答倚桂樹兮超然託
蟾蜍以寄聲兮願清光之永圓

明月落兮西極繁星燦兮如積風瀟瀟兮四起紛草木

兮狼籍玄鶴饑鳴兮潛蛟凍泣衆昏昏兮同夢欲晤語
兮安得倘明月兮迴光尚佳人兮可覲

明河歌

至元壬辰秋八月二十有九日夜闌酒醒起步於庭
仰觀明河賦詞三章聊寄聲於騷人之末

明河在天兮可望不可親明月出海兮流清光而照人
露霑裳兮風吹巾遊無侶兮居無鄰種瑶草兮堂陰歲
悠悠兮未春琴有絃兮樽有酒聊酣歌兮樂吾貧

明河在天兮南北西東人生有命兮禍福窮通或風虎
兮雲龍或霧豹兮冥鴻觀古今兮賢哲事何必兮皆同
華星皎皎兮雲光沒素月娟娟兮烟霽空憶美人兮天
末折瑤草兮山中歲既晏兮路復遙馬玄黃兮車未攻
歸來兮息駕勞心兮忡忡

明河在天兮莫濟吾舟北斗南箕兮事亦悠悠呼天風
兮未來嘆黃鶴兮淹留瑤水兮崑丘羣僊兮遨遊激沆
瀣兮洒甘澤洗黃塵兮清九州樂下土兮逍遙復駕言

兮將何求


文孝王廟迎送神歌

天門曉兮玉鎖開朝萬靈兮君始來駕雲車兮策風馬
君無為兮久徘徊潔精誠兮薦丹素我民籲兮君所哀
瑶芳兮玉醕山吟兮水舞神樂兮民勸祀益隆兮千古
靈宮嵯嵯兮山之幽神方樂兮胡不少留簫鼓咽兮樽
俎徹松桂悲吟兮山水愁保康寧兮驅厲疫終千古兮
荷神休

登憲陵

陵崔嵬兮映山脚人惆悵兮懷天末天悠悠兮山冥冥
雲溶溶兮煙漠漠恨翠鸞兮無書悵離情兮莫託蘭無
馨兮蕙衰我胡為兮空盤礴澹容與以忘歸兮招吟魂
於寂寞忽雞犬其何處兮淡夕陽之城郭獨翩然以長
嘯兮振疎風於林薄思賢王之樂善兮恨九原之莫作
迴愁心於萬里兮攬不盈於一握已矣哉古原空兮青
草合陰風起兮白日落歲月冥兮行人稀天地荒兮虎

狼惡悵茫茫今何歸吾將浩歌長往赴松喬之約



蘭軒集卷二